

## PHILLIPS, DAVID (1751-1825), gweinidog gyda'r Undodiaid

**Enw:** David Phillips  
**Dyddiad geni:** 1751  
**Dyddiad marw:** 1825  
**Rhyw:** Gwryw  
**Galwedigaeth:** gweinidog gyda'r Undodiaid  
**Maes gweithgaredd:** Crefydd  
**Awduron:** Robert Thomas Jenkins, John Oliver Stephens

Ganwyd yn 1751 yn y Waun-bwll ger Glandŵr, Sir Benfro, ond wedi priodi aeth i ffermio 'r Pant-glas yn Llanboidy (Caerfyrddin). Yr oedd yn aelod yng Nglanŵr, a dywed rhai y byddai'n pregethu yno, ond amheuir hyn. Pan aeth y blaid Arminiaidd allan o eglwys Glandŵr a ffurfio eglwys newydd yn Rhyd-y-parc (Llanwinio), tua 1787, ymunodd Phillips â hi, a dechreuodd bregethu; ac ar farw [Owen Davies](#) yn 1792, urddwyd ef yn weinidog. Yr oedd yn Undodwr pendant erbyn 1811, pan ymwelodd y cenhadwr Undodaidd Lyons â'r lle, ond ' yn rhy fregus ei iechyd i wneud llawer.' Wedi iddo symud o Bant-glas, a phrynu tyddyn Pant-maen yn ymyl Rhyd-y-parc, llysenwid ef yn 'apostol Pant-maen.' Ymddengys mai [Benjamin Phillips](#) o Sain Clêr a [William Thomas](#) o Langyndeyrn oedd prif gynheiliaid Rhyd-y-parc yn henaint Phillips, ond erbyn 1816, pan ymwelodd y cenhadwr Wright â'r eglwys, yr oedd yno weinidog cynorthwyol o'r enw John Evans - y mae'n bosibl mai'r John Evans a enwir ar t. 500 o *Hanes Bed. Deheubarth* [David Jones](#), ond y mae'n debycach mai'r John Evans a oedd ar yr un pryd (1816-25) yn bugeilio'r Undodiaid a ymgynullai yn hen gapel y Porth Tywyll yng Nghaerfyrddin. Bu Phillips farw 11 Mehefin 1825, ' yn 74 oed ' meddai ei feddfaen yn Rhyd-y-parc.

Nai iddo oedd DAVID PHILLIPS, (fl. 1814), emynydd Undodaidd; amaethwr y Pilmawr, Rhyd-y-parc. Nid oes awgrym iddo bregethu erioed, eithr, yn ôl [Titus Evans](#), ' meddai ar gyneddfau cryfion a chafodd ddysgeidiaeth dda i'w gwrteithio. Yr oedd yn feddiannol hefyd ar gyfran o'r awen brydyddawl fel y gwelir yn yr hymnau a Chân y Drindod a gyfansoddodd ac a ymddangosodd yn ei ddydd trwy yr angraffwasg. ' Teitl y llyfryn yw *Ychydig o hymnau newyddion yn bennaf at wasanaeth Undodiaid, gan David Phillips, Pilmawr, ger Rhydypark* (Caerfyrddin, J. Harris, 1814). Rhydd y rhagair (saith tudalen) olwg ar ganiadaeth a diwinyddiaeth yr Undodiaid yn y cyfnod.

### Awduron

Yr Athro Emeritus Robert Thomas Jenkins, (1881 - 1969)

Y Parchedig Athro John Oliver Stephens, (1880 - 1957)

### Ffynonellau

*Monthly Repository*, 1811, 683 ff, (Lyons), a 1816, 680 ff. (Wright)

*Yr Ymfynnydd* 1884, 123, 279 (a chymharer 1859, 195)

*Yr Ymfynnydd*, 1930, 21

*A History of Carmarthenshire*, ii, 248-9 (cywirer 'Penmaen' yn 'Pant-maen') a 247

### Dolenni Ychwanegol

Wikidata: [Q20732880](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.